

ԿԱՅԱՆ ԲԵՐԴԻ ԵՎ ԳԱՎԱՌԻ ՏԵՂԱԴՐՈՒԹՅՈՒՆԸ

Ռ. Ի. ՄԱԹԵՎՈՍՅԱՆ

Բագրատունյաց շրջանում, պետականության վերականգնումից հետո, Հայաստանում հիմնվել են բազմաթիվ ռազմականներ, բերդեր և այլ ամրություններ, որոնք հսկում էին ստրատեգիական և առևտրական ճանապարհները, ապահովում երկրամասի պաշտպանությունը: Առավել խոշորները դառնում էին իշխանական դղյակներ և հաճախ վերածվում բերդաքաղաքների: Լոռվա թագավորությունը նույնպես ուներ իր պաշտպանական ամրությունները: Միայն Դավիթ Անհողինը (996—1048) կառուցել էր տասներկու բերդ, այդ թվում Լոռին¹, ուր Շամշուգեի կորստից հետո, 1065 թ. տեղափոխվեց Կյուրիկյանների մայրաքաղաքը: Ժամանակի ընթացքում Լոռին դարձավ նաև Գուգարքի գլխավոր առևտրա-արհեստավորական կենտրոնը:

Մյուս կարևոր ստրատեգիական հենակետն էր Կայան ամրոցը, կառուցված է հավանաբար X դ. սկզբին: Կյուրիկյանների օրոք՝ X—XI դդ. եղել է պահակային բերդ, որը պաշտպանել է թագավորության արևելյան սահմանները: Այստեղ է ապաստանել շրջակայքի բնակչությունը վտանգի պահին: Աստիճանաբար բերդի նշանակությունը մեծանում է և XII—XIII դդ. դառնում խոշոր ավատատիրական տների նստոցը, Մահկանաբերդի Արծրունիների և Զաքարյանների առանձին ճյուղերը Կայանում են հիմնում իրենց դղյակները: Որպես խոշոր ռազմական շինություն, կապված Կյուրիկյան և Զաքարյան շրջանների հետ, բերդը մեծ հետաքրքրություն է ներկայացնում պատմաբանի ու հնագետի համար:

X—XIII դդ. մատենագիրների տեղեկություններից հնարավոր է որոշակիորեն պատկերացնել բերդի ու գավառի ձևատագիրը մինչև մոնղոլների տիրապետության շրջանը: Հետագա դարերում բերդի վիճակը նյութի պակասության պատճառով մշուշապատ է:

Շատ սուղ են աղբյուրները բերդի տեղագրության փնտրելու, Գիտնականները այդ հարցը արժարժեք են գավառի տեղագրության հետ՝ կռվան ունենալով գլխավորապես Հովհաննես Դրասխանակերտցու ու Կիրակոս Գանձակեցու հաղորդումները:

Միջնադարյան հեղինակներից առաջինը Կայան բերդը հիշատակում է Հովհաննես Դրասխանակերտցին: 922 թ. Աշոտ Նրկաթի հետ թշնամացած Ուտիքի իշխան Սահակը մտել էր Բագրատունիներին պատկանող Զորոփոր գավառը և գրավել նրա ամրոցները, որոնցից պատմիչը հանվանե հիշատակում է միայն Կայանը: Արքան ստիպված է եղել մի զորամասով անցնել Գուգարք... Վհայճեպով գան հասանեն ի Զորոփոր: Եւ տեսանեն նախ զԿայան

¹ Հաւաքումն պատմութեան Վարդանայ վարդապետի, Վենետիկ, 1862, էջ 106 (այսուհետև Վարդան)։

կոչեցեալ բերդ յափշտակեալ իշխանին Սահակայն², Կիրակոս Գանձակեցու մոտ Կայան բերդը անբաժան է Աղստեի ավազանի Կայան գավառից³։ Այդ երկու փաստերի հիման վրա Հ. Հյուբշմանը Ջորոփորը նույնացնում է Կայանի հետ և բերդը տեղադրում Աղստեի հովտում⁴։ Նույն հովտում են տեղադրում բերդը նաև Ղ. Ալիշանը, որը սակայն, Ջորոփորը չի նույնացնում Կայանին և լեռն⁵։

Սակայն ինչպես իրավացիորեն նկատել է Հ. Մանանդյանը, հարցը պահանջում է հատուկ քննություն⁶։

Նախկին Կյուրիկյան թագավորության սահմաններում Կայան բերդ հայտնի է Դեբեդ (հին Ջորագետ) գետի ափին, Հաղբատի դիմաց։ Հուշարձանը զիտական շրջաններին ծանոթ է սակավաթիվ այցելուների նկարագրություներից, առաջին հերթին Սարգիս Զալալյանցի, Հովհաննես Ղրիմեցու և Գրիգորիս Երզնկյանցի նոթերից⁷։ Նյնելով բերդի անունից՝ նրանք առանց տարակուսելու գրավոր աղբյուրների տեղեկությունները վերագրել են Հաղբատամերձ բերդին և այն նույնացրել միջնադարյան Կայանի հետ։ Դրանով իսկ առաջ են եկել տարակարծիքներ։

Այս առեղծվածի պատասխանը չի տրվել և հարցը մինչ այսօր մնում է լուծված։ Նրա լուծմանը մեծապես կօգնենին արեղումները, սակայն բերդը հնագիտական հետազոտության առարկա չի դարձել և մեզանում հիշվում է միայն ուղեցույցներում և Հաղբատին նվիրված ուսումնասիրություններում⁸։ Անհրաժեշտ է համակողմանի ուսումնասիրել նաև գրավոր աղբյուրները։ Առաջինը նման աշխատանք է ձեռնարկել Վենետիկի մխիթարյան Մ. Հովհաննիսյանը, որի մենագրության մեջ Կայան բերդին հատկացված է առանձին բաժին⁹։ Այս հետազոտությունը աչքի է ընկնում նյութի ընդգրկման լայնությամբ, հեղինակը քննում է միմյանց հետ կապված երեք՝ բերդի կառուցողի, կառուցման ժամանակի և տեղադրության հարցերը։ Հովհաննիսյանը ընդունում է այն տեսակետը, որ Հաղբատի մոտ կիսավեր վիճակում

2 Յովհաննու կաթողիկոսի Դրասխանակերտցւոյ, Պատմութիւն Հայոց, Թիֆլիս, 1912, էջ 310։

3 Կիրակոս Գանձակեցի, Պատմութիւն Հայոց, Երևան, 1961, էջ 209—210։

4 Հ. Հյուբշման, Հին Հայոց տեղւոյ անունները, Վիեննա, 1907, էջ 235։

5 Ղ. Ալիշան, Տեղագրի Հայոց Մեծաց, Վենետիկ, 1853, էջ 83, Լեռ, Հայոց պատմություն, հ. 2, Երևան, 1967, էջ 559։

6 Հ. Մանանդյան, Քննական տեսություն հայ ժողովրդի պատմության, հ. Բ, մ. Ա, Երևան, 1957, էջ 308։

7 Մ. Զալալյանց, Ժանապարհորդութիւն ի Մեծն Հայաստան, մ. Ա, Տիֆլիս, 1842, էջ 81—82։ Описание монастырей Ахпатского и Сананнского архимандрита Иоанна Крымского, СПб, 1863, էջ 10—11։ Այս աշխատությունը հայերեն հրատարակվել է 1965 թ.՝ Յովհաննու Ղրիմեցու Պատմութիւն հուշակվոր վանից Հաղբատայ Մ. Նշանին, հրատարակեց Համազասպ Ոսկյան, Վիեննա, 1965, էջ 55—56, 105, 142, Գ. Երզնկյանց, Կայան բերդ և Կայենոյ ձոր (Աղգագրական հանդես, Գ, Թիֆլիս, 1898, էջ 316—328)։

8 Հ. Եղիարզարյան, Ալավերդու շրջանի հուշարձանները (ուղեցույց), Երևան, 1952, էջ 26։ Նույնի՝ Հաղբատի վանքը և նրա հետ կապված Հաղբատ գյուղի հուշարձանները («Էջմիածին», 1961, հ. Դ, էջ 49—51), Կ. Ղաֆարյան, Հաղբատ, Երևան, 1963, էջ 81—84, Բ. Զուհարյան, Սովետական Հայաստանի պատմական հուշարձանները, Երևան, 1961, էջ 118։

9 Մ. Հովհաննիսյան, Հայաստանի բերդերը, Վենետիկ, 1970, էջ 533—548, նույնը առանձին հոդվածով՝ Կայենոյ կամ Կայեան բերդ («Բազմավեպ», 1963, № 4—8, էջ 111—121)։

պահպանված բերդը համապատասխանում է հին Կայանին: Այս եզրակացությունը, սակայն, վիճելի է:

Որևէ հուշարձանի տեղագրության հաջող լուծումը սերտորեն կապված է կառուցողի և նրա ապրած ժամանակաշրջանի ճշտման հետ: Այդ հարցում նույնպես կա որոշ խառնաշփոթություն: Աղբյուրները Կայան բերդի կառուցումը վերագրում են երկու տարբեր անձնավորությունների՝ Հոլում Վասակին (մահ. 1021 թ.) և Հասան Կայենացուն (XII դ. երկրորդ կես), որոնցից ոչ մեկը չէր կարող կառուցել X դ. սկզբին արդեն գոյություն ունեցող բերդը: Հաշվի առնելով, որ Դրասխանակերտցու ժամանակ Գուգարքը պատկանում էր Բագրատունիներին, կարելի է համաձայնվել Հովհաննիսյանի հետ¹⁰ և հավանական կառուցող համարել Աշոտ Երկաթին, առավել ևս, որ վաղ միջնադարում բերդը աղբյուրներում չի հիշատակվում:

Այնուհանդերձ սրտք է պարզել նշված երկուսի առնչությունը Կայանի հետ: Հոլում Վասակը (Պահլավունին) Գագիկ Ա-ին ժամանակակից Հայոց սպարապետն էր, որի մասին Մխիթար Այրիվանեցին գրում է. «Սա է (Գրիգոր Մագիստրոսը) որգին Հոլում Վասակայ շինողին Բջնոյ, Կայենոյ և Կայծոնոյ, ղոր յանդէտս սպանին ի Սերկէիլէ»¹¹, 1045 թ. Գրիգոր Մագիստրոսը իր տիրույթների հետ միասին Կայանը հանձնեց Բյուզանդիային և հեռացավ Միջագետք¹², Պետք է ենթադրել, որ Կյուրիկյանների բերդին այդ ժամանակ տիրացել էին Պահլավունիները: Միանգամայն հավանական է, որ կորուստը տեղի էր ունեցել 1001 թ., երբ Գագիկ Շահնշահը խռոված Դավիթ Անհողինից խլեց որոշ շրջաններ և միացրեց Բագրատունյաց թագավորությանը: Դրանց թվում պետք է լինեին նաև Կայանն ու Կայծոնը, եթե հաշվի առնենք, որ 1020 թ. այդ բերդերը բաժին էին հասել Անիի թագը ժառանգած Հովհաննես Սմբատին. «... մեռաւ Գագիկ, տուեալ զթագաւորութիւնն երից որդոց իւրոց... Զթագն տայ Յովանիսի, և զԱնի և զՇիրակ... զԿայեան և զԿայծոն և զՏաւուշ գաւառն Սեւորգեաց...»¹³:

Ըստ երևույթին, Կայանը և նրա շրջանը Կայծոնի հետ միասին Հովհաննես-Սմբատ տվել էր ի տնօրինություն Պահլավունիներին, որոնք պահեցին իրենց ձեռքում 25 տարի և, ի վերջո, հանձնեցին Բյուզանդիային: Հասկանալի է, որ Վասակ սպարապետը ոչ թե կառուցել էր, այլ միայն նորոգել էր բերդը: Մ. Հովհաննիսյանը իրավացի է, որ Այրիվանեցու «շինող» բառը տվյալ դեպքում նշանակում է «նորոգող»: Սակայն հետազայում Կյուրիկյանները ևս ստացան կորցրած հողերը: Դրան նպաստեց կայսրության նոր քաղաքականությունը Հայաստանում: Սելջուկների դեմ պատվար ունենալու անհրաժեշտությունը ստիպում էր նրան հովանավորել հայ ու վրաց գահակալներին: Դավիթ Անհողինի որդին՝ Կյուրիկե Ա-ն (1048—1089) նույնիսկ չլքեց կտրելու իրավունք ստացավ և պատված էր «կյուրապաղատ» տիտղոսով: Նրան վերադարձվեցին նաև հոր տիրույթները:

Հասան Կայենեցու մասին կարելի է խոսել ավելի հանգամանորեն: Բերդի կառուցումը Հասանին վերագրում է Վարդան պատմագիրը. «... զի յայնմ

10 Մ. Հովհաննիսյան, Հայաստանի բերդերը, էջ 540—541:

11 Մխիթարայ Այրիվանեցու Պատմութիւն Հայոց, Մոսկվա, 1860, էջ 58—59:

12 Վարդան, էջ 99:

13 Վարդան, էջ 92:

ժամանակի նա (Իվանե Զաքարյանը) ունէր զկայեան հայրենեօք ի Հասանայ Կայենեցոյ շինողէ բերդին»¹⁴:

Մ. Հովհաննիսյանը շատ թերահավատ է նշված հաղորդման նկատմամբ: Հասանին նա համարում է օտար իշխան (անշուշտ նրա ոչ հայկական անվան պատճառով), որը հայ հողի վրա չէր կարող բերդ կառուցել¹⁵: Սակայն թերահավատության համար ոչ մի հիմք չկա: Հասանը օտար չէր, նա հայ ավատատեր էր և սերում էր Մահկանաբերդի Արծրունյաց տոհմից: Նրա հայրը XII դ. հայտնի պետական գործիչ Ամիր-Քուրդ Արծրունին էր, որը վրաց արքունիքում վարում էր Քարթլիի և Թբիլիսիի Ամիրապետության պաշտոնը¹⁶: Վրացիները Ամիր-Քրդին անվանում էին Աբուլ-Հասան¹⁷, որը արաբերեն նշանակում է «Հասանի հայր»: Քրդի անվան այս ձևը արդեն հուշում է, որ նա պետք է Հասան անունով որդի ունենար: Եվ իրոք, 1957 թ. հայտնաբերվեց մի արձանագրություն, գրված Քրդի որդի Հասան Կայենեցու անունից: «[Քրդի] իշխանաց իշխանին եւ մանդատուրտուխուցիսին որդոյ, Հասանա Կայենեցո շինեցի զհոգեպետունս ի մեջ լեռանց ի ոտս Փուսա հաստատ հարեւոյս մեր Կայենի և կանգնեցի զսբ խաչս վասն արեւշատութեան եւ վասն երկար կենդանութեան ինձ և զաւակաց իմոց, յիշեցեք»¹⁸:

Այս շինարարական արձանագրությունը վերաբերում է քարավանատան (=հոգեպետան) շինությանը, որը կառուցվել է Դվինից Տփղիս տանող առևտրական ճանապարհի վրա, անցնում էր Հրազդանի հովտով և իջնում դեպի Աղստև: Շենքի ավերակները այժմ գտնվում են Դղմաշեն գյուղից դեպի հյուսիս՝ 12 կմ հեռավորությամբ¹⁹: Քարավանատան կառուցումը պատահական չէր. Մահկանաբերդի Արծրունիների տունը լայն կապերի մեջ էր Հայաստանի, Վրաստանի և հարևան երկրների՝ Կաբինի ամիրայության, Հյուսիսային Կովկասի առևտրական խավերի հետ: Արծրունիները, Զաքարյանների տան մեծամեծների հետ գլխավորում էին հայ առևտրա-վաշխառուական դասը:

Մեր պատմագիրներից, բացի Վարդանից, Հասանին ճանաչում է նաև Ստեփանոս Օրբելյանը: Վերջինը հետաքրքիր մանրամասն է հաղորդում Հասանի քաղաքական կենսագրությունից: Հասանը մասնակցել է 1177 թ. վրաց Օրբելիների գլխավորած հակապետական խռովությանը և միացել սպասալար Իվանեն Օրբելուն. «...և ամենքեան համագունդ դիմեալ եկեալ էին առ նա (Իվանե Օրբելի) յԱգարակն դարապաս՝ Քարթլիս Հէրիսթաւքն... և Տաշրացիքն և Կայենեցիքն Հասան և Անեցիքն Գրիգոր Ապիրատեանց»²⁰:

¹⁴ Նույն տեղում, էջ 140:

¹⁵ Մ. Հովհաննիսյան, էջ 538—539:

¹⁶ С. Еремян, Юрий Боголюбовский в армянских и грузинских источниках (երևանի պետամալաթարանի «Գիտական աշխատություններ», 1946, հ. 23, էջ 399, 404, 407):

¹⁷ История и восхваление венценосцев, грузинский текст перевел К. Кекелндзе, Тбилиси, 1954, էջ 40:

¹⁸ Վ. Հարությունյան, Միջնադարյան Հայաստանի աշխարհիկ ճարտարապետությունը (ՀՄՄՀ ԳԱ «Տեղեկագիր», 1957, № 8, էջ 80):

¹⁹ Վ. Հարությունյան, Միջնադարյան Հայաստանի քարավանատներն ու կամուրջները, Երևան, 1960, էջ 44—46: Արձանագրությունը գրված է բազալտե քարից պատրաստած խաչի երեսին, որի լուսանկարը արվում է նույն գրքի 45 էջում:

²⁰ Ստեփանոս Օրբելյան, Պատմութիւն նահանգին Սիսական, Թիֆլիս, 1910, էջ 384:

Կայանների անունը վկայում է, որ Կայան բերդը եղել է Հասանի նստոցը։ Նրր բն Արծրունիները տիրացել, չենք կարող ասել, բայց 1177 թ. արդեն նրանց ձեռքում էր։ Օրբելիների խռովությունը մեղելուց հետո Քուրդը շնորհադուրկ եղավ և զրկվեց բոլոր պաշտոններից։ Դա պետք է իր պատճառներն ունենար։ Առաջիմ մանրամասները պարզ չեն, բայց նրա որդու հարելը խռովարարներին անհետեանք չէր կարող մնալ։ Քուրդ իշխանը գնաց Կարին, Սալդուխ ամիրայի մոտ, Սարգիս Ջաքարյանի միջնորդությամբ Վրաստան վերադարձավ միայն 1185 թ. Թամար Բագուհու ժամանակ և վերստին ստացավ իր տիրույթներն ու պաշտոնները։ Նրա դարձի կապակցությամբ Կիրակոս Գանձակեցին գրում է. «Ապա դարձ եղև իշխանին Քուրդին ի հայրենիսն իւր զալ յաշխարհն Կայենոյ և Մահկանաբերդոյ, եւ բազում մեծարանս եղ նմա թագուհին Վրաց, որ Թամարն կոչէր, դարձուցանելով ի նա զհայրենի տեղիսն և ալլս յոլովս»²¹, 1185 թ. Քուրդը ետ ստացավ հայրենի տիրույթները՝ Կայանն ու Մահկանաբերդը, որոնք թողել էր 1177 թ.։ Ուրեմն Կայան զավառին Արծրունիք տիրացել էին մինչև 1177 թ., ավելի որոշակի թվական առաջիմ չենք կարող նշել։ Վարդանի հաղորդումը Հասանի կողմից Կայանը կառուցելու մասին վրիպակ չէ, բայց այս դեպքում «շինողն» նույնպես պետք է հասկանալ «նորոգողն» իմաստով։ Գավառն ու բերդը Արծրունիները պահեցին մինչև 1191 թ.։

Այն հեղինակները, որոնք Կայանը տեղադրում են Դեբեդի ափին, բերդի կառուցումը վերագրում են Հաղբատի առաջնորդ Հովհաննես եպիսկոպոսին, Ջաքարյանների տոհմից։ Կիրակոս Գանձակեցին նրա մասին գրում է. «Սա շինեաց բերդ մի ամրագոյն պարսպօք մէջ ընդ Հաղբատ և ընդ Սանահինն»²², Նույն Հովհաննեսը բերդի ներսում կառուցել է եկեղեցի և թողել հետեւյալ արձանագրությունը. «Ի թուին Հայոց ՈԶԲ (1233) կաման Աստուծոյ, ես՝ տէր Յոհանէս, առաջնորդ Հաղբատա, քուերորդի մեծ պատրոնացն Ջաքարէի եւ Իւանէի, ի ժամանակի, որ եհաս սասանումն աշխարհիս մերոյ անաւրէն խորազմենցն, ոչ գոյր տեղի ապաստանի սուրբ Նշանիս և եղբարցս։ Հրամանաւ քեռոյն իմո Իւանէի եւ որդոյն իւրոյ Աւագին, եւ Շահնշահի՝ որդոյն Ջաքարէի չինեցի զամրոցս եւ զեկեղեցիս Հաղբատա սուրբ Նշանիս բաղում աշխատութեամբ։ Արդ, եթէ ոք զսա ի Հաղբատա հանէ, թէ ի մեծաց, թե ի փոքունց զինչ եւ իցէ պատճառաւ, մարդն այն նզովեալ եղիցի ի մահ եւ ի կեանս...»²³, Այս արձանագրությունը լրիվ համահունչն է Գանձակեցու տեղեկության հետ և հստակ պատասխան է տալիս այն հարցին, թե ե՞րբ, ո՞ւմ կողմից և ի՞նչ նպատակով է կառուցված։ Կառուցվել է Հաղբատի առաջնորդ Հովհաննես եպիսկոպոսը 1233 թ. վանքի միաբանությունը Ջալալեդդինի արշավանքների տարիներին ապաստանելու համար։

Մ. Հովհաննեսյանը ալլ կերպ է մեկնաբանում արձանագրությունը։ «Շինեցի» բառը այս դեպքում ևս նա հասկանում է «նորոգեցի» իմաստով։ Նրա կարծիքով՝ Հովհաննես եպիսկոպոսը միայն նորոգեց Աշոտ Նրկաթի կառուցած բերդը²⁴, որը այժմ էլ կիսավեր կանգնած է Կիրակոսի նշած տեղում՝

²¹ Կիրակոս Գանձակեցի, էջ 209։

²² Կիրակոս Գանձակեցի, էջ 99։

²³ Կ. Ղաֆադարյան, Հաղբատ, էջ 250—251։

²⁴ Մ. Հովհաննեսյան, էջ 539—540, 544։ Հեղինակը բերդի նորոգումը սխալմամբ քննում է Ո (1151) թվին։ Սխալը գալիս է Ջալալյանցի թյուր ընթերցումից (ձանապարհորդու-

Հաղթատի և Սանահնի միջև և կոչվում է Կայան: Այդ հաստատում են տեսնողները՝ Զալալանցն (XIX դ.) և Զուհարյանը մեր օրերում: Այսպիսով՝ Մ. Հովհաննիսյանը եզրակացնում է, որ միջնադարյան Կայան բերդը կառուցված է եղել Հաղթատի և Սանահնի միջև, Ձորադետի ափին²⁵:

Երկու հանգամանք թույլ չեն տալիս համաձայնվել առաջարկած մեկնաբանության հետ: Առաջին. XIII դ. բերդը Կայան չի կոչվել և, փաստորեն, անանուն է եղել: Կիրակոսը այն անվանում է Քեբրդ մի ամրագոյն պարսպօք մէջ ընդ Հաղթատ և ընդ Սանահնին», իսկ Հովհաննես Եպիսկոպոսը՝ «Ամրոց Հաղթատայ սբ. Նշանին»: Վերջինս նույնպես հատուկ անուն չէ և ցույց է տալիս միայն շինության բնույթը: Ծիշտ է, այսօր այդ բերդը կոչվում է Կայան, սակայն գիտական գրականության մեջ իրավացիորեն նշվել է, որ այդ անունը նոր է²⁶, այդպես է կոչվել, անկասկած, ապաստանավայր լինելու պատճառով ավելի ուշ ժամանակներում, և հնարավոր չէ որոշել թե երբ:

XVII դ. վերջում Առաքել Դավրիժեցին բերդի եկեղեցին անվանում է «Տես և անց»։ «Թուին ՌՃԺՆ (1668)... եղև շարժս այս յԱրտաւել քաղաք, ի Թաւրէզ, լճրեան, ի Տփղիս, ի Գանջայ, ի Շամախի, ի Դամուրղափուն, և յամենայն սահմանս իւրեանց, և յայսմ շարժմանէ Հաղպատայ վանից եկեղեցոյ ներսի երեսէն որմոյ քարինքն թափեցան, և եկեղեցին որում անուն Տես և անց ասէին, որ ի մէջ Հաղպատայ և Սանահնոյ կայր շինեալ՝ բնաւին փլաւ...»²⁷: Թեև այդ անունը բացատրվում է բերդի դժվար մատչելիությամբ: Բոլոր հիմքերը ունենք եզրակացնելու, որ դարերի ընթացքում ծառայելով վանքի միաբանությանը որպես ապաստանավայր, այն ավանդական ձևով դիտվել է որպես «Կայան» և այդպես էլ կոչվել XVII դ. հետո: XIX դ. նոր անունը արմատացած էր և դարձել էր հանրաճանաչ: Սարգիս Զալալյանցը, Հովհաննես Ղրիմեցին և մյուսները ակամա շփոթության մեջ ընկնելով, առանց կասկածանքի բերդը նույնացրել են Կյուրիկյանների Կայանի հետ, դրանով իսկ նոր սխալների գուռ բացել²⁸:

Երկրորդ: Հիշենք, որ «Ամրոց Հաղթատ սբ. Նշանին» կոչված բերդը կառուցվել է Սանահնի և Հաղթատի միջև, վերջինի միաբանությանը ապաստան տալու համար: Եթե սա Կայանն է, ապա երկու վանքերն էլ Հովհաննես Դրասխանակերտցու ժամանակ (922 թ.) պետք է արդեն հիմնված լինեին, այլ կերպ ամրոցը չէր կառուցվի, այնինչ Սանահնի վանքը հիմնվել է 966—972 թթ. (նկատի ունենք վանքի գլխավոր՝ Ամենափրկիչ եկեղեցու կառուցումը, մյուս եկեղեցիները կառուցվել են ավելի ուշ), իսկ Հաղթատի վանքի գլխավոր եկեղեցին՝ Ս. Նշանը, որի համար կառուցվել է բերդ-ամրոցը՝ 976—

թիւն..., էջ 81), որից օգտվել է Մ. Հովհաննիսյանը: Ծիշտ Բվականն է ՈԶԲ (1233): Արձանագրության անձինք՝ Իվան Զաքարյանի որդի Ավագը (մահ. 1250 թ.), Զաքարի ամիրասպասարի որդի Շահնշահը (մահ. 1261 թ.), 1151 թ. չէին կարող հիշատակվել, Այդ հանգամանքի վրա երկուսն էլ ուշադրություն չեն դարձրել:

²⁵ Նույն տեղում, էջ 544—546:

²⁶ Կ. Ղաֆադարյան, Հաղթատ, էջ 81, 251:

²⁷ Պատմութիւն Առաքել վարդապետի Դաւրիժեցւոյ, Վաղարշապատ, 1896, էջ 665: Գ. Երզնկյանցն (էջ 319) և Ս. Էփրիկյանը՝ Պատկերազարդ բնաշխարհիկ բառարան, հ. 2, Վենետիկ, 1907, էջ 273, Դավրիժեցու հաղորդումը թյուրիմացաբար վերագրում են Զաքարիա սարկավագին:

²⁸ Հ. Մանանդյան, էջ 308:

991 թթ.²⁹, Ուրեմն Դրասխանակերտցու ժամանակ Ձորագետի ափին բերդ չէր կառուցված, որովհետև վանքերը դեռ չէին հիմնվել: Զխոսելով արդեն այն մասին, որ վանքի միաբանությունը պետք է բավականին մեծ թիվ կազմեր, որպեսզի նրա համար հատուկ ամրոց-ապաստան կառուցվեր, իսկ դա կատարվել է աստիճանաբար, XI—XII դդ.:

Նշված պատճառներով Հաղբատի «Ամրոց Ս. Նշանի» կառուցման ժամանակը հնարավոր չէ տեղափոխել X դ. 20-ական թվականները: Դա Դրասխանակերտցու հիշատակած բերդը չէ, կառուցվել է 1233 թ. և հատուկ անուն չի ունեցել:

Կա մի երրորդ պարադա ևս, որը ժխտում է Մ. Հովհաննիսյանի և այլոց եզրահանգումը. Հաղբատի ամրոցի նույնացումը Կայան բերդի հետ ինքնին ենթադրում է հին Կայան գավառի տեղագրումը Դեբեդի հովտում: Սակայն մասենադիրները այդ անունով կոչել են բացառապես Աղստեի ավազանը: Այդ բանը ճիշտ են հասկացել Ալիշանն ու Հյուբշմանը, բայց առաջինը բոլորովին չի նշել օգտագործած աղբյուրները, իսկ երկրորդը վկայակոչել է միայն Կիրակոս Գանձակեցուն: Ըստ երևույթին այդ է պատճառը, որ գավառից անբաժանելի Կայան բերդը դուրս է բերվում Աղստեի ավազանից և տեղադրվում Դեբեդի ափին: Նախ անհրաժեշտ է ի մի բերել աղբյուրների տվյալները Կայան գավառի մասին և պարզել նրան համապատասխանող ֆիզիկո-աշխարհագրական շրջանը, ապա փորձել նրա սահմաններում գտնել բերդը:

Դա հնարավոր է լուծել XII—XIII դդ. մատենագիրների օգնությամբ, որոնք գավառի մասին խոսելիս իրենց հաղորդումները զուգորդում են տեղագրական ծանոթություններով: Օրինակ, Գանձակեցին Մխիթար Գոշի մասին գրում է. «Եւ բնակեցաւ նա ի վանքն, որ կոչիւր Գետիկ, ի գաւառին Կայենոյ, ի վերայ գետոյն մեծագունի, զոր անուանեն Աղստեոյ գետ, յաջմէ կողմանէ գետոյն»³⁰: Ստեփանոս Օրբելյանը նույնպես Աղստեի շրջանը ճանաչում է որպես Կայան: XII դ. վերջից Կայանին տիրող Զաքարյաններն իրենց ենթակա գավառներում ժառանգական իրավունքով կառավարիչներ էին նշանակում և այդ եղանակով ստեղծում նոր ֆեոդալական տներ: Այդպիսիներից էր նաև Սյունյաց Օրբելյանների տունը, որի հիմնադիրն էր Լիպարիտ Օրբելին: Լիպարիտը Իվանե Զաքարյանից ստացավ Վայոց ձորը, Կոտայքը, Գեղարքունիքի մասը, Որոտան և Բարկուշատ բերդերը Սյունիքում, ապա՝ «Ի Կայեն զԱղստե իւր կերովն»³¹:

Աղստեի ավազանը երբեմն կրել է նաև այլ անուններ: Օրինակ, X դ. հեղինակ Ստեփանոս Տարոնեցին գործածում է «գավառ Աղստե» ձևը: 1001 թ., երբ Կյուրիկյան Դավիթ Անհողինը ըմբոստացել էր Գագիկ Ա-ի դեմ և չէր ճանաչում նրա սյուղերենությունը, Հայոց արքան պատժիչ արշավանք էր կազմակերպել Գուգարք: Դավթի երկրում շրջելուց և նրա բերդերը քանդելուց հետո Գագիկը Շընդ Գագ բերդ անցանելով ել նա ի գաւառն Աղստե»³²:

29 Հմմտ. Կ. Ղաֆադարյան, Սանահինի վանքը և նրա արձանագրությունները, Երևան, 1957, էջ 15, 26: Նույնի՝ Հաղբատ, էջ 13—15:

30 Կիրակոս Դանձակեցի, էջ 209:

31 Ստեփանոս Օրբելյան, էջ 397:

32 Ստեփանոսի Տարոնեցոյ Ասողկան Պատմութիւն տիեզերական, ՍՊԲ, 1885, էջ 280:

Գագը Աղստեի ավազանի մեծ բերդերից է, գտնվում է Նոյեմբերյանի շրջանի Կոթի գյուղից արևելք, շրջակայքը՝ Գագա դաշտը հարուստ է հուշարձաններով, որոնցից առավել նշանավորները հիշատակվում են XIII դ. աշխարհագիր Վարդան վարդապետի մոտ. «Վրկանի աշխարհն Գրիմն է, ձգի մինչև ի Կասբից ծովն եւ ապա դաշտն Գագայ, ուր կայ սուրբ Սարգիսն, եւ Մշկայ վանքն եւ Մակարայ վանքն, եւ բերդն Կայեն եւ Կայծոն»³³,

Մեզ համար կարևորն այն փաստն է, որ Կայան բերդը գտնվում էր Գագա դաշտում կամ մոտ էր նրան, դրանով իսկ պարզվում է, թե Աղստեի ավազանի որ մասում պետք է կենտրոնացնել բերդի որոնումները:

XII—XIII դդ. շրջանը երբեմն անվանել են նաև գավառի մյուս խոշոր բերդի՝ Մահկանաբերդի անունով, որը Քուրդ Արծրունու նստոցն էր: Մատենագրական սուղ տվյալներից կարելի է մոտավոր ճշտություններ որոշել բերդի դիրքը:

1280 թ. Դեզմուտի վանքում գրված հիշատակարանում վանքը համարվում է Մահկանաբերդի սահմաններում. «Ի յերկիրս Մահկանաբերդոյ ի վանսն Դեզմուտ»³⁴: Վանքը գտնվում է Աղստեի հովտում, Իջևանի շրջանի Գետաշեն գյուղից 15 կմ հարավ-արևմուտք: Դրանով իսկ որոշվում է Մահկանաբերդի դիրքը Աղստեի հովտում: XII դ. հեղինակ Դավիթ Քոբայրեցին «Մահկանաբերդ գավառում» է տեղադրում Կայան բերդը: 1177 թ. վրաց Օրբելինների խոսվածքի մասնակ սպասալար Իվանե Օրբելին փակվել էր Լոռվա բերդում, իսկ նրա եղբայր Լիպարիտը փորձել էր ամրանալ իրենց դաշնակից Հասան Արծրունու նստոց Կայանում: Սակայն Լիպարիտը չհասավ տեղ, Գեորգի Գ-ի հրամանով Քուրդ իշխանը (որը հավատարիմ էր մնացել թագավորին) փակեց նրա ճանապարհը և ջարդեց զորամասը: Այդ մանրամասնությունները հայտնի են Քոբայրեցու հիշատակարանից. «Լիպարիտ... առնու զորդի թագաւորին զԴեմետրէ և դիմէ յանմատոյցն Կայան, որոց զհետմտեալ հրամանաւ թագաւորին բարեպաշտ ամիրապետն Տփիսեաց, Քուրդն անուանեալ, հասանէ ի կիրճս ճանապարհի նոցա, յիւր սեփականն գաւառն Մահկանաբերդն կոչեցեալ, հարկանէ դէմ յանդիման նոցա...»³⁵: Մահկանաբերդ գավառի բերդերը՝ Կայան և մյուսները կարող էին գտնվել միայն Աղստեի հովտում: Դրանով իսկ որոշվում է Կայան գավառի տեղադրությունը նույն գետի ավազանում³⁶, նման եզրակացությունը հաստատվում է Զաքարյանների տան կալվածքների ներքին վարչատնտեսական բաժանմամբ: Նրանց երկու ճյուղերը տիրացել էին նախկինում Կյուրիկյաններին պատկանող մարզերին, Հաղրատն ու Սանահինը Զորագետի ամբողջ լեռնահովիտով գտնվում էին ավազ եղբոր Զաքարե ամիրապետի իշխանության սահմաններում, իսկ Կայանն ու Կայծոնը (Կայան

³³ «Աշխարհացոյց Վարդանայ վարդապետի», քննական հրատարակություն Հայկ Պերպերյանի, Փարիզ, 1960, էջ 34: Նույն աղբյուրի համառոտ օրինակում Կայենի և Կայծոնի անունները ձուլված են միմյանց. «Կայէնկեծոյ բերդն մօտ է Գագայ դաշտեն» (էջ 17):

³⁴ Մաշտոցի անվ. Մատենադարանի ձեռագիր № 5254, էջ 54բ:

³⁵ Վ. Հ ա կ ո բ յ ա ն, Դավիթ Քոբայրեցու հիշատակարանը (ԳԱ «Տեղեկագիր», 1952, № 8, էջ 119—120):

³⁶ Դրանով է բացատրվում, որ Աղստեի ավազանի հուշարձանները մատենագիրները դիտում են որպես Կայանի հուշարձաններ: Դրանցից են Հաղարծինը, Գետիկը, Զաքարյանները սպառվել էին Սյունյաց առաջնորդ Ստեփանոս եպիսկոպոսին. «Շնորհ ի Կայեն տեղի հանգստեան նմա զգերահռչակ ուխտն Հաղարծին և զիւղն զԱբասաձորն»: Ս տ ե փ ա ն ո ս Օ Ր Բ Ե Լ յ ա ն, էջ 342: Կ ի ր ա կ ո ս Գ ա ն ձ ա կ ե ց ի, էջ 173, 203:

գավառը) պատկանում էր Իվանեին³⁷։ Դա նշանակում է, որ Հաղբատն և ընդհանրապես Ձորադետի հովիտը Կայան գավառից դուրս էին, Ձորագետ—Դերեդի ավաղանը չէ, որ կոչվել է «գավառ» կամ «աշխարհ Կայենո»³⁸։

Ուրեմն ոչ թե Դերեդի, այլ Աղստեի հովտում կարող էր գտնվել Կայան բերդը։ Մ. Հովհաննիսյանը բերդի առկայությունը Դերեդի ափին բացատրում է նրանով, որ Աղսաևը Գանձակեցու մոտ նույն Ձորագետն է, նրա երկրորդ անունը։ Այս տեսակետը հիմնավորվում է երկու փաստարկներով։ Պատմիչը Աղստե անվանելով մեծ (մեծագունի) նկատի ունի Ձորադետը, որովհետև դավառի³⁹ միակ մեծ գետը Ձորագետն է, մինչդեռ Աղստե լոկ գետակ է և չէր կարող կոչվել մեծ։ Երկրորդ. Կայան բերդի մոտ էր գտնվում Վարդան Արևելցու ճգնարանն ու դպրոցը. «և ինքն եկեալ ի ձորն Կայանոյ ի միայնարանն իւր, զոր սուրբ Անդրէն կոչէին, հանդէպ անառիկ բերդին Կայանոյ...»⁴⁰։ Ս. Անդրեի միանարանը Ս. Զալալյանցի վկայությամբ այսօր գտնվում է Դերեդի ափին, Հաղբատի մոտ։ Այս հանգամանքը նույնպես հաստատում է, որ Կիրակոսի Աղստեը նույն Ձորագետն է⁴¹։

Նման փաստարկումները շատ երբեք են։ Զալալյանցը սխալ կերպով նույնացնելով Հաղբատի ամրոցը Կայան բերդին, Կ. Գանձակեցու հաղորդումից ենթադրել է, որ այստեղ պետք է ուսուցաներ Վարդան Արևելցին և մի տապանաքար վերագրել է պատմագրին։ Սակայն տապանաքարի վրա գրած է միայն «ԶԻԲ» (1273)⁴² և հայտնի չէ, թե ում գերեզմանն է։ Դրան հակառակ ունենք գրավոր վկայություն, որ պատմագիրը թաղված է Խոր Վիրապում⁴³։

Միանգամայն սխալ է երկու գետերի նույնացման վերագրումը Կիրակոսին. պատմիչը Աղստե անվանելով մեծ կամ մեծագունի ոչ մի դեպքում չի հասկացել Ձորագետը (Դերեդը)։ Ժիշտ է, նա Ձորագետը անունով չի հիշատակում, բայց հստակ պատկերացում ունի և խիստ զատում է Ձորադետի ավազանը Աղստեի ավազանից։ Օրինակ, նա պատմում է, որ Զաքարե սպասալարը ցանկանում էր որոշ փոփոխություններ մտցնել հայ եկեղեցու ծխակատարություն մեջ, որին դիմադրում էր հոգևորականությունը։ Մասնավորապես Հաղբատի առաջնորդ Գրիգոր եպիսկոպոսի կարգադրությամբ քարկոծվում է Զաքարեի նվիրակ Մինասը, բայց այնուհետև պատժից խուսափելու համար Գրիգորը ստիպված փախչում է Գոշի մոտ. «Եւ նա փախստական գնաց յաշխարհն Կայենոյ, ի վանքն Գետիկ, առ մեծ վարդապետն Մխիթար...»⁴⁴։

37 Լ. Մ Ե Լ Ի Ք Ս Ե Թ-բ ե կ, Վրաց աղբյուրները Հայաստանի և հայերի մասին, հ. Բ, Երեւան, 1936, էջ 13—14։

38 Հմմտ. Ս. Երեմյան, Հայաստանը X դ. վերջին և XI դ. սկզբին, քարտեզ «Հայկական ՍՍՀ Ատլասում», Երեւան, 1961, էջ 105։

39 Գավառի սահմանները Մ. Հովհաննիսյանը որոշում է Ձորադետից մինչև «այսօր Աղստե կոչված գետը» և այդ ամբողջ շրջանը անվանում է Ձորոփոր (էջ 542)։ Ձորոփոր գավառի տեղադրության շուրջ գոյություն ունեն տարակարծիքներ։ Հովհ. Դրասխանակերտցու խոսքերից դատելով՝ Ձորոփորը պետք է զբաղեցնեի Աղստեի միջին հոսանքի լեռնահովիտը, բայց մասնագետներից շատերը (Ղ. Ալիշան, Ս. Երեմյան և այլք) գավառը տեղադրում են Ձորադետի հովտում։ Հարցը կարող է հատուկ քննության։

40 Կ Ի ր ա կ ո ս Գ ա ն ձ ա կ ե ց ի, էջ 311։

41 Մ. Հ ո Վ հ ա ն ն ի ս յ ա ն, էջ 542—544։

42 Ս. Զ ա լ ա լ յ ա ն ց, էջ 82։

43 Աշխարհացոյց Վ ա ր դ ա ն ա յ վ ա ռ դ ա պ ե տ ի, էջ 29։

44 Կ Ի ր ա կ ո ս Գ ա ն ձ ա կ ե ց ի, էջ 173։

Ինչպես տեսնում ենք, Կիրակոսի համար Ձորագետը (Հաղբատը) բոլորովին տարբեր է Աղստեից (Գետիկից)։ Այն, ինչ Հովհաննիսյանի ենթադրությամբ մեկ գավառ էր Ձորոփոր անունով, իրականում երկու տարբեր գավառներ էին՝ Տաշիր ու Կայան, յուրաքանչյուրը իր գլխավոր դետով։

Այսպիսով, աղբյուրների ներկա քննությունից պարզվեց, որ միջնադարյան Կայան բերդը գտնվում էր Աղստեի ավազանի սահմաններում։ Բերդին հարևանցող հուշարձաններից մեզ հայտնի են Մշկավանքն ու Մակարավանքն, որին շատ մոտ է Դեղձնուտի վանքը։ Դրանք գտնվում են Աղստե գետի միջին հոսանքում, որը ներկա վարչական բաժանումով համապատասխանում է Իջևվանի շրջանին։ Իջևանի շրջանի բերդերն են՝ Աղջկա բերդը (Ղըզղալա), Մանթաշը, Բերդաբարը (Մահկանաբերդը) և մի քանի այլ փոքրիկ բերդաշինություններ։

Մեր համոզմամբ Կայանին համապատասխանում է Աղջկա բերդը։ Դրա համար կան բոլոր նախադրյալները՝ բերդը կառուցված է դժվար մատչելի բարձր լեռան վրա և միջնադարում, իրոք, կարող էր լինել անառիկ, հարմարեցված է մեծ թվով մարդկանց տեղավորելու համար, ունի լավ պահպանված ամուր և ամբողջական պարիսպներ։ Ներսում կան՝ մեծ ջրավազան, պահեստասենյակներ, պահպանվել են բնակատեղերի հետքեր և կիսավեր եկեղեցի։ Բերդը գրտնրվում է Աղստեի ձախ ափին, Իջևան քաղաքից 15 կմ արևմուտք, Գագ բերդից մոտ 40 կմ հեռավորությամբ։ Մանթաշը չէր կարող լինել Կայան, որովհետև այն փոքր է, չունի ապրելու համար անհրաժեշտ կառույցներ։

XIV դ. հետո, օտար տիրապետության պայմաններում, երբ ասպարեզից հեռացել էին տեղի հայ ֆեոդալները, բերդը լքվեց, իսկ Կայան բառը կորցրեց իր իմաստը և աստիճանաբար մոռացվեց։ Ժամանակի ընթացքում երևան եկան նոր տեղանուններ։ Գավառը XVII դ. սկզբին կոչվել է «Ղրաղի ձոր», բերդի նոր՝ «Աղջկա բերդ» անունը կապված է ժողովրդական ավանդության հետ⁴⁵։

МЕСТОРАСПОЛОЖЕНИЕ КРЕПОСТИ И ПРОВИНЦИИ КАЯН

Р. И. МАТЕВОСЯН

Р е з ю м е

Одной из известных крепостей Гугарка в эпоху Кюрикидов (X—XI вв.) и Закарянов (XII—XIII вв.) был замок Каян. Однако его местоположение до сих пор точно не установлено. Мхитарист М. Ованисян в работе «Крепости Армении» (Венеция, 1970), отождествляет Каян с одноименной крепостью на р. Дебед, около Ахпата.

Сопоставление источников X—XIII вв. приводит к выводу, что крепость находилась в долине р. Агстев и соответствует нынешней «Девичьей крепости» (Աղջկա բերդ) Иджеванского района. По имени крепости называлась и провинция.

⁴⁵ Հմմտ. Զաքարիա սարկավազի մոտ. «գաւառին Կայենաձորոյ՝ որ է Ղրաղի ձոր»՝ Զարեհայ սարկավազի Պատմագրութիւն, Վաղարշապատ, 1870, էջ 24, 26։ Ավանդությանը կարելի է ծանոթանալ գրականությունից, Մ. Բարխուդարյան, Արցախ, Բաքու, 1895, էջ 393—394։